

– Նա մի կորած մայր է պտռում, Մարո, բայց որտե՞ղ է, յայտնի չէ, խեղճը միշտ յիշում է նրան:

– Այդ ես էլ իմանում եմ, – պատասխանեց Մարոն:

Դառնալով դեպի մեր վրանը, մենք անցանք «Փորձութեան ձորերի» միջով: Այնտեղ էր «Վիճակի ժայռը»: Նա կոչում էր «Վիճակի ժայռ» այն պատճառով, որ նրա վրայ ուխտաւորները փորձում են իրանց բախտը: Նրանցից իւրաքանչիւրը մօտենում է ժայռին, ամնում է գետնից քարի փոքրիկ կտոր եւ կպցնում է ժայռին: Եթէ քարի կտորը մնայ նրա վրայ կպած, նշանակում է, որ նրա ուխտը ընդունելի է եզած: Իսկ եթէ պոկ գալով, քարը վայր ընկաւ, վիճակափորձը տխուր դէմքով հեռանում է խորհրդական ժայռից:

Մարոն մօտեցաւ փորձելու իր բախտը, բայց այնքան բազմութիւն թափած էր այնտեղ, որ չկարողացաւ տեղ գտնել: Մենք թողեցինք այդ մի ուրիշ ժամանակի:

ԼԳ. ԲՈՂՈՔ ՎԱՆԱԿԱՆ ՍՐԲՈՒԹԵԱՆ ԴԵՄ

Գիշերից բաւական անցել էր, երբ դարձանք մեր վրանը: Պառաւ խաթունը անթուն պահապանի նման հսկում էր: Մարգարիտը քնած էր, փոքրիկ Սալբիին սեղմած ունենալով իր գրկում: Զնի մէջ նա մոռացել էր իր քօղը, երեսը մնացել էր բաց: Պառաւը տեսնելով իմ ներս մտնելը, նրա երեսը ծածկեց: Մարոն սկսեց ծիծաղել, որ ոչ սակաւ բարկութիւն պատճառեց պառաւի մէջ:

– Դու ոչ ահն ես իմանում, ոչ ամօթը, Մարո, միայն աստոած գիտէ թէ թո վերջն ինչ կլինի... – ասաց նա ծանր կերպով:

Մարոն ժպտաց եւ ոչինչ չպատասխանեց:

Մարոն թէեւ խոստացաւ, թէ կաշխատէ, որ ճանապարհին Մարգարիտին խօսացնէ ինձ հետ, կամ նրան իր երեսը բաց անել կը տայ ինձ մօտ, բայց հնար չեղաւ. Մարգարիտը մնաց ինձ համար միշտ լուռ եւ վարագուրեալ կուռք:

Առաւօտը պետք է լուսացնէր տիրոջ կիւրակէն – տօնի մատաղ կտրելու օրը: Ահա այդ պատճառով, կեսգիշերից սկսած, ամէն մի ուխտաւորի վրանի առջեւ, գետնում փորած հնոցի մէջ, վառում էր կրակ, եւ նրա վրայ դրած կաթսայի մէջ եփ էր գալիս մատաղի խաշլաման: Շոգին կաթսաների արտաշնչութիւնից լցրել էր օդը ախորժ-բարեպաշտական հոտով: Մի քանի տեղերում դեռ նոր էին մորթում զոհերը: Վանքի մղդսիները փութաջան